

V E N D I M
Nr.217, datë 10.4.2003

PËR RITJEN E MASËS SË SHPËRBLIMIT TË VETERANËVE TË LUFTËS
ANTIFASHISTE NACIONALÇLIRIMTARE TË POPULLIT SHQIPTAR

Në mbështetje të nenit 100 të Kushtetutës, të nenit 8 të ligjit nr.7874, datë 17.11.1994 “Për statusin e veteranit të Luftës Antifashiste Nacionalçlirimtare të popullit shqiptar”, të neneve 21 e 27 të ligjit nr.8379, datë 29.7.1998 “Për hartimin dhe zbatimin e Buxhetit të Shtetit të Republikës së Shqipërisë” dhe të nenit 7 të ligjit nr.8983, datë 20.12.2002 “Për Buxhetin e Shtetit të vitit 2003”, me propozimin e Ministrit të Mbrojtjes, Këshilli i Ministrave

V E N D O S I:

1. Në vendimin nr.190, datë 3.5.1995 të Këshillit të Ministrave “Për zbatimin e ligjit nr.7874, datë 17.11.1994 “Për statusin e veteranit të Luftës Antifashiste Nacionalçlirimtare të popullit shqiptar”, të bëhen këto ndryshime:

-Pika 7 ndryshohet si më poshtë vijon:

“7.a. Për veteranët që luftuan në formacione luftarake, të çdo rangu, kundër pushtuesve nazifashistë, të inkuadruar përpara datës 10.7.1943, shpërblimi të bëhet 3 092 (tre mijë e nëntëdhjetë e dy) lekë në muaj.

b. Për veteranët që luftuan në formacione luftarake, të çdo rangu, kundër pushtuesve nazifashistë, të inkuadruar në periudhën 11.7.1943 deri në 24.5.1944, shpërblimi të bëhet 2476 (dy mijë e katërqind e shtatëdhjetë e gjashtë) lekë në muaj.

c. Për veteranët që luftuan në formacione luftarake, të çdo, rangu kundër pushtuesve nazifashistë, të inkuadruar në periudhën 25.5.1944 deri në 29.11.1944, shpërblimi të bëhet 2 061 (dy mijë e gjashtëdhjetë e një) lekë në muaj.

ç. Për veteranët që luftuan në formacione luftarake, pas datës 29.11.1944 e që vazhduan luftën jashtë kufijve të atdheut, shpërblimi të bëhet 618 (gjashtëqind e tetëmbëdhjetë) lekë në muaj.”.

- Pika 8 ndryshohet si më poshtë vijon:

“8.a. Të burgosurit në burgjet nazifashiste, brenda dhe jashtë vendit, për kohën e burgosjes mbi 6 muaj të marrin një shpërblim prej 1 030 (një mijë e tridhjetë) lekësh në muaj.

b. Të burgosurit në burgjet nazifashiste, brenda dhe jashtë vendit, për kohën e burgosjes deri në 6 muaj të marrin një shpërblim prej 618 (gjashtëqind e tetëmbëdhjetë) lekësh në muaj.”.

- Pika 9 ndryshohet si më poshtë vijon:

“9.a. Të internuarit në kampet e përqëndrimit nazifashist të marrin një shpërblim prej 3 092 (tre mijë e nëntëdhjetë e dy) lekësh në muaj, plus masën e shpërblimit të invalidit të grupit të parë.

b. Të internuarit në kampet e internimit, brenda dhe jashtë vendit, të marrin një shpërblim prej 2 061 (dy mijë e gjashtëdhjetë e një) lekësh në muaj.”.

- Pika 11 ndryshohet si më poshtë vijon:

“11. Veteranët e plagosur në luftë, të cilët nuk përfitojnë statusin e invalidit të luftës, përveç shpërblimit mujor të veteranit, të marrin edhe një shtesë prej 1 030 (një mijë e tridhjetë) lekësh në muaj.”.

- Pika 13 ndryshohet si më poshtë vijon:

“13. Familjeve të veteranëve të vdekur, që përfitojnë këtë status, por që nuk kanë marrë shpërblimin prej 100 (njëqind) lekësh në muaj, t’u jepet një shpërblim i menjëhershëm prej 41 253 (dyzet e një mijë e dyqind e pesëdhjetë e tre) lekësh.”.

2. Institutit të Sigurimeve Shoqërore, në buxhetin e miratuar për vitin 2003, t’i shtohet fondi prej 32 400 000 (tridhjetë e dy milionë e katërqind mijë) lekësh, për mbulimin e shpenzimeve që rrjedhin nga zbatimi i këtij vendimi.

3. Ky fond të përballohet nga fondi rezervë i Këshillit të Ministrave.

4. Ngarkohen Ministria e Mbrojtjes, Ministria e Financave dhe Instituti i Sigurimeve Shoqërore për zbatimin e këtij vendimi.

Ky vendim hyn në fuqi pas botimit në Fletoren Zyrtare dhe i shtrin efektet financiare nga data 1.1.2003.

KRYEMINISTRI
Fatos Nano